

## EU – 28.06.2018

Wat ass eigentlech genee d'EU?

EU steet fir Europäesch Unioun. Et ass een Zesummeschloss vu verschiddene Länner aus Europa, déi sech zesumme gedoen hunn an sech fir déi selwecht Ziler anzesetzen. An dëser Unioun gëllt fräi Mobilitéit vu Persounen a Gidder. D.h., dass Persoune fräi an aner EU-Länner reesen an och an aneren EU-Staate schaffen kënnen. Och am Handel sinn d'Grenzen ofgeschaaft, well et ee keen Zoll bezuele muss wann ee Wueren aus engem aneren EU-Staat importéiert oder dohinner exportéiert. A bestëmmten anere Beräicher, ginn et och gemeinsam Regeln, wéi z.B. an der Landwirtschaft, a verschidde Länner hunn déi selwecht Währung.

Haut sinn 28 Länner Deel vun dëser Unioun, déi e groussen Deel vun dem europäesche Kontinent ausmécht. Et liewen iwwer 500 Millioune Mënschen an der EU.

No zwee Weltkrieger hu verschidde Länner an Europa gesot, dass een eng Institutioun brauch, déi iwwer national Grenzen ewech Stabilitéit a Fridde garantéiert. Et wollt ee verhënneren, dass sech dat Leed vum Krich widerhëlt.

Am Ufank stoung déi wirtschaftlech Zesummenaarbecht tëschent de verschiddenen europäesche Länner am Virdergrond. Et gouf sech erhofft, dass een duerch dës Zesummenaarbecht och fir politesch Stabilitéit a Fridde suerge kéint. 1958 gouf dofir d'Initiativ geholl, eng europäesch Wirtschaftsgemeinschaft tëschent 6 Länner ze grënnen: d'Belsch, Däitschland, Frankräich, Italien, Lëtzebuerg an Holland.

Dës Gemeinschaft, huet sech zu enger Organisatioun entwéckelt, déi gemeinsam Politik mécht a probéiert gemeinsam Léisungen fir regional a global Problemer ze fannen. Dozou gehéiere Froen, déi z.B. den Ëmweltschutz, d'Gesondheet, d'Außebeziungen, d'Sécherheet an d'Migratioun betreffen.

All Staaten an der EU sinn awer weiderhi souverän an onofhängeg. Dat bedeit, dass de jeeeweilige Staat weiderhin eleng all staatlech Gewalten an der Hand huet. National Gesetzer maachen, se ausféieren a Recht sprächen – insgesamt bestëmmt de Staat weiderhin iwwer sech selwer. Et gëtt awer gewëssen Entscheidungen, déi nëmmen op engem internationalen Niveau sënnavoll kënnen getraff ginn. Dofir ginn d'Staaten d'Recht, Entscheidungen a bestëmmte Beräicher ze huelen, un d'EU of.

Och hei gëtt et ee Parlament, dat vun de Bierger aus der EU gewielt gëtt a Gesetzer stëmmt. Et gëtt eng Kommissioun, déi nei Gesetzer virschléit an de Rot vun der EU, wou d'Ministeren aus de Memberlänner sech treffen. Si mussen Gesetzer unhuelen an Entscheidungs koordinéieren.

Et ass kloer, dass et net ëmmer einfach ass, wann sou vill eegestänneg Natiounen mussen zesumme kommen, fir gemeinsam Léisungen ze fannen, déi um Schluss méiglecherweis géint déi individuell Interesse vun eenzele Länner kéinte goen.

# POLITIKLEXIKON



D'Unzuel vun de Memberstaate ka sech änneren, well et Länner ginn, déi sech a Verhandlung befanne, fir der Unioun bäizetrieden. Duerch de Referendum a Groussbritannien gëtt et beim sougenannte Brexit elo och déi éischte Kéier e Land, dat nees aus der Unioun austrëtt.